

Paul, Colossia Whut'enne Buts'ó K'e Yanguz-i

Colossia whut'enne Paul hadih 'ubulhni

1 ¹ Si Paul Sizi Gri 'en be whel'a'-un 'ust'oh. Yak'usda whuz un'a sba hukwa' ninzun. 'Ink'ez neulhutsin Timothy bulh.

² Nohni Colossia whut'enne Gri unidulhne hadih nohts'út'ni. Gri 'en ooyudúlhts'i. Yak'usda ooch'e' 'ahli. Nohni neulhutsinke ooba 'alha 'uhoont'ohne 'ahli. Yak'usda neBá 'ink'ez Sizi Gri neMoodihti, 'en ts'un nohdzi dóghel 'ink'ez ye unzoo-i cha nohbulh óot'e' ha, 'et whuz un'a za ooh't'e' hukwa' nuszun.

Dahoont'oh whe Gri Sizi 'en nohba 'alha' 'unt'oh

³ 'Et Yak'usda Sizi Gri neMoodihti ooBá, 'en ts'un musi ts'ut'ni, 'ink'ez 'ahoolhyiz nohni nohba tenazdudli.

⁴ Nohni nohbulh uzdits'o dahoont'oh whe Gri Sizi 'en nohba 'alha' 'unt'oh 'ink'ez Yak'usda ooch'e' unline, 'enne ts'iyawh buk'ehtsi'.

⁵ Ndai yak'uz ts'e nohba 'ilhozkat-i, 'i ooka tse hóhle'. 'Et huwa buk'eohtsi', 'ink'ez khuni unzoo-i whutsoda' bulh 'údahts'o.

⁶ Ndi khuni unzoo-i ndi yun k'ut ndulcho whe núdilh'ts'ut 'ink'ez 'i be 'unizt'ai le' hint'oh. Nohni cha whuz un'a za nohghu dilts'ut. Ndet dzin 'udechoo whudáhts'o whe khuni 'alha' 'unt'oh-i, 'i gha Yak'usda ye unzoo-i t'ewhunihzin, 'ink'ez 'on nus soo náhyeh.

⁷ Epaphras 'en 'ilhoghun be 'ustle-un, 'en nebulh 'ut'en-un 'unt'oh 'ink'ez ook'ets'intsi'. 'En gha ye unzoo-i hodilh'e'. 'En nohni nohba Gri 'en yuba ne'ut'en-un unli 'unt'oh, 'ink'ez 'aw nohla dootnih ait'oh.

⁸ 'Ink'ez Ndoni be ts'iyanne k'ehtsi', neúlhni.

Gri 'en ts'iyantsuk whe 'uk'enus diziti-un 'unt'oh

⁹ 'Et whula gha ts'e 'oh da' ndet dzin whulh 'úzdants'o, 'oh da' whuts'un nohba tenazdudli-un 'aw 'etsul lhe'ts'udísni. Whuz un'a Yak'usda nohba ts'oodulh'kut whe nohts'o hukwa' ninzun-un, soo ts'ih'un un'a t'ewhunoohzeh. 'Et whe Ndoni 'en be, be whutnih-i 'ink'ez be t'eeonudzun-i cha, 'i ts'iyawh 'i be dutíh'ibun.

10 'Et neMoodihti 'en ba ts'ih'un un'a ndi yun k'ut dúlhts'i.

Ndai 'ulh'en-i ts'iyawh yé hot'e'. 'Ut'en unzoo-i 'i oots'u ha yóokat, 'ink'ez Yak'usda 'on nus t'entihzeh.

11 Ye ulhtus-i dizti'-i, ts'iyawh 'i be 'on nus ulhtus óohle. 'Ink'ez hoonáht'i' whe soo hoonli talhodahni 'ink'ez dzoh nahdeh-un whulh nudulhya.

12 'Ink'ez neBá musi dahni. Yak'usda ooch'e'ne be hóot'en-i toh nudilhyanne, 'en yut'i-i bugha ítalelh-i, 'i ooloh negha tikulh, 'et wheni soo' ts'uldzoo' nesulhtsi.

13 NeBá ndi tsalhgus yo ulhtus-i ts'u ha náneanla, 'ink'ez duYe' yuk'e ntsi'-un, nts'e whulerwe unli-un, 'et nenáneninla.

14 'En duduzkai' be naneonket. 'Et whe nelubeshi ts'iyawh neba 'un yutilhdil.

15 'Et Yak'usda 'aw lhist'en whe 'unt'oh 'et hoonts'i ooYe' 'en yundult'oh whe 'unt'oh t'ets'oninzun. Ndi ts'iyaitsuk 'ulya-i, 'i 'udechoo whuzdli-un unli, 'et huwa ts'iyawh whumoodih unli.

16 'En be ts'iyaitsuk 'ulya 'et huwa. Ndai yat 'ink'ez yak'uz cha 'unt'oh-i, 'ink'ez ndi yun k'ut cha. Ndai uznilh'en-i 'ink'ez lhts'is'en-i cha. Yak'uz ts'e kw'uts'uzda cho dizti'-i k'udilh'ts'ine, 'ink'ez nududeh-i ulhtus-i, 'i cha 'uyínla. Ndet la whe hooncha tune' whut'en-un, 'ink'ez whulohne nududeh-i 'uyoo nududeh-i k'une' yul'en, 'ohwhi cha 'uyínla. 'En oogha 'úhoolya 'ink'ez ooba 'uhóolya.

17 'Ink'ez 'en 'unt'oh ts'iyai tso unli, 'ink'ez 'en gha ts'iyai lhootun le' 'unt'oh.

18 'Ink'ez Yak'usda ba 'ilhunaoodulhne, hiyust'e hinli, 'en butso whudilh'dzulh-un 'unt'oh. Mbe 'udechoo whe' whudit'en-un, 'en 'unt'oh. 'Ink'ez yaidlane butoh, 'en 'udechoo whuzdli-un 'unt'oh. 'Et 'en ts'iyaitsuk yanus dizti'-un 'unt'oh.

Gri Yak'usda duts'un nenánedilya

19 Yak'usda hoont'i' whe nts'en'a la dant'oh, ooYe' yulh hulhgha 'unt'oh whe 'unt'oh.

20 'En gha ts'iyaitsuk 'ink'ez wheni cha Yak'usda duts'un nenánedilya. Ts'iyaitsuk ndi yun k'ut 'unt'oh-i, 'ink'ez yak'uz cha 'et hoonts'i, tulalhgus k'ut buzkai' ooch'a yuntsus-i, 'i be whudizghel neba whulhtsi.

21 'Ink'ez 'oh da' nohni cha Yak'usda ooch'oh 'aht'oh inle'. Noheni be ooch'az ditnine 'ahli inle', 'ink'ez hoonts'i' tune' zaht'en. 'Et hoonts'i' dughu nanohnínla.

22 OoYe' ndi yun k'e inya whe wheni nek'un'a ooyust'e whuzdli', 'ink'ez 'i be neba dazsai. 'Et huwa 'aw 'on 'un nebulh lhúhiskoh.

'Et whe nohtsun hooloh tileh. Nohk'éholts'it cha ait'oh. 'Ink'ez 'aw 'on 'un nohch'az yaooduk ait'oh. 'Et whuz un'a duBá ts'un nohtileh.
 23 Be nohba 'alha 'uhoont'oh-i, soo duts'o-i whe oohtun. 'Ink'ez whuduts'o-un yoh ook'u whuz'ai-i le' 'aht'oh. 'Ink'ez khuni unzoo-i bulh 'udahts'o-un, ndi khuni ooka tse hóohli khun oola doohtnih junih. Ndi yun k'ut ndulcho whe ndi khuni unzoo-i bugha ídilt'sut. 'Et huba si, Paul, Gri ba ne'ut'en-un susdli'.

Soo hooltus whe 'ust'en

24 'Et 'andit Gri 'en gha nohba dzoh nuszut-un hoonúst'i'. 'Et syust'e k'oh 'uhoont'oh-un 'i be 'en ooyust'e ba lhaoodutisdleh. Ndi ooyust'e, 'i Yak'usda ba 'ilhunaoodulh-un, 'et 'uw'húlhni.

25 'Et huba ooba ne'ut'en-un susdli'. Yak'usda ye soo' whulh'en-i, nohni nohgha sgha whunt'ai, 'et whe nohba oola 'ust'en-un susdli'. 'Et Yak'usda ooghuni ts'ih'un un'a lhadutisdleh.

26 Ndi whe' hoont'oh hooyoh-un, 'aw niz de ha oodanzut whuts'un, ts'iyanne buch'a whunist'i. 'Et hoonts'i 'awet Yak'usda ooch'e'ne, wheni ts'iyawh ts'et gaih whunénilhtan.

27 Ndi whe' hoont'oh hooyoh-un, 'et t'ets'ontizeh 'et nets'u hukwa' ninzun. Dawhuldzoo' 'ink'ez dawhulcho 'uhoont'oh 'ink'ez 'udun yun k'ut whut'enne, 'enne buba' hoont'oh. Gri 'en nohyudinda, 'et huwa Yak'usda ye diziti'-i, 'i ooka tse hoohli.

28 'En ghun ts'iyanne bulh yats'ulhduk. Be whutnih-i, 'i be ts'iyanne bugha ts'útni, 'ink'ez ts'iyawh whubuts'odulh'eh. 'Et whe ts'iyanne Gri Sizi 'en be lhadulyane 'uhoot'e'. 'Et whuz un'a za 'uhint'oh whe neBá oots'un buztileh.

29 'Et huba soo hoolhtus whe 'ust'en. Nts'en'a ye ulhtus-i, 'i ye sílhtus whe 'ust'en, 'et 'uw'hultus whe 'ust'en.

Ndi yun k'ut khuni, 'i 'ants'i 'únt'oh, Gri 'en 'udetso 'unt'oh

2¹ 'Et nohni Laodicea whut'enne, 'ink'ez mbene la 'aw sulhi'elne, nohni ts'iyawh t'ewhutihzeh 'et nohts'u hukwa' nuszun, dawhulcho-i be hoolhtus whe nohba hukwa' 'ust'en.

2 'Et budzi do na'ootneh 'ink'ez be lkh'e ts'utsi'-i be 'ilho nahoodle'. 'Et whuz un'a ndi Yak'usda be whe' hoont'oh hooyoh-un, daltsuk 'uzoo'-i, 'i be' hoont'oh, 'i ts'iyawh soo ts'ih'un un'a t'ewhuntiszeh. NeBá 'ink'ez Gri cha, 'enne bughun 'uhoont'oh.

3 Dawhuldzoo'-i be ts'uwhunih-i 'ink'ez daldzoo'-i be t'eeonúdzun-i cha, 'i ts'iyawh 'en ooyo ts'e neba whuntilh'i.

4 Njan nohdusni khun 'uyoonne soo yahalhduk whé nanohonoo'ah junih.

5 'Aw syust'e be nohbulh lhe'ust'oh. 'Et hoontsi syughi 'i be nohbulh 'ust'oh. 'Ink'ez hoonust'i' whe ts'ih'un un'a ne'aht'en-un 'ink'ez Gri ulhtus-i be nohba 'alha' 'unt'oh, 'et ts'iyawh t'eeonúszun.

6 'Et huwa nts'en'a Gri Sizi 'en neMoodihti úlhchoot, 'et whuz un'a ndi yun k'ut dúlhtsi.

7 'En be 'ants'i nohghih whuzdli' le' 'aht'oh, 'ink'ez 'en be ulhtus sáhli. 'Et whuz un'a nohba 'alha' 'uhoont'oh-un, 'en bulh 'ilho oohle' ha. 'Et whunanohodalh'e', 'et whe 'on nus ulhtusne tihle. 'Et huwa lhk'uz te musi dáhtni.

8 Huwahli doo ka la 'uyoonne nanohonoo'ah buk'úne' ooht'en ha. Dune dich'oh duk'un'a nuní hunuzut-un, k'us 'ants'i khuni be yáhalhduk-un, k'us dune didutch'oh duk'oh ts'e huhutni, k'us ndi yun k'ut huwu ni hukw'un'a dune hohodulh'e'. 'Aw njan Gri ook'un'a iloh.

9 Yak'usda dant'oh la unli, 'et Gri 'en ts'iyawh 'ilho yust'e za yudinda 'et huwa.

10 'Ink'ez nohni cha ooyudúlhtsi, 'et whe lhadínt'ohne sahli'. Njan dune 'udetso whudilhduh-un 'ink'ez dune ando 'uhint'oh-un, Gri 'aw 'en za ts'iyantsuk k'une' whul'en.

**Moses be 'udustlus ook'une' ts'ut'en-un,
Gri ts'iyawh neba gak whulhtsi**

11 'Ink'ez 'en be nohuhúzt'us le' 'aht'oh. 'Aw dune oola be lhe'hóonel. Lubeshi nohyust'e be 'ulh'en-i, ts'iyawh nohyust'e yuch'a nayuzdla. Whuz un'a Gri 'unohínla.

12 Too be 'úlhneh whe 'et 'ants'i hiyulh ánohalhti lé'aht'ih. 'Ink'ez Yak'usda be 'ut'en-i, 'i be yaidlane toh Gri dunabudinla, 'et nohba 'alha' 'uhoont'oh. 'Et 'i be dunabudinla, 'et whuz un'a nohni cha hiyulh dúnanuhodinla whe' hoont'oh.

13 'Ink'ez nohni ninta' 'aht'ih-un 'ink'ez nohyust'e k'ut 'aw lhunohuhít'us, 'et huwa dazahtsai whe 'aht'oh. 'Et hoontsi 'andit 'en bulh nakhíhtna' whe 'aht'oh. Ts'iyawh whe tank'us 'úts'it'en-un neba whula ditni.

14 Dune ne'hutit'en-un Moses ooghuni 'uk'u neyuzguz-i nedulhyoh 'uhoont'oh'un, 'et ts'iyawh neba whusanáhon'ai. Ndi 'uk'e hóoguz-un, 'et nedulhyo ts'e hoont'oh. 'Aw whenghu ts'óya' ait'oh. Ndi khuni yílhchoot 'ink'ez tulalhgus k'ut wheyundunilht'o whe ts'iyawh neba gak whulhtsi.

15 Ndunne ntsi'-i nududehne 'udetso whudilhduhne, 'ink'ez dune ando 'uhint'oh-un cha, 'et whe hilhtus-un ts'iyawh bughu nahóolhchoot. Ts'iyanne nalh yooya 'ubulhtsi. 'Et whe buch'a' nilhde.

16 'Et huwa ndai 'ah'alh-i 'ink'ez ndai 'ahtnai cha, k'us budzenis whuti, 'ink'ez sa i'aih-un cha, 'ink'ez Lizwif nahulyis dzin cha, ndi 'i ts'iyawh 'et huwun nohodoolhtsi' junih.

17 'Ohwhi 'ants'i tsa whus'ih le' hoont'oh. 'Et hoontsi' nus de whusawhutilts'ulh-un, Gri ooch'e' 'uhoont'oh, 'et za ts'ih'un 'uhoont'oh.

18 Ndet whuch'a oonúlhde-un nohghá whults'ut khun 'uyoonne nohghu ha óodunit'ah de, khun buk'oh ts'e oohneh junih. Ndu'tenne huhoont'i' whe huwhuts'it whe dudzi yo 'uhilhdzun na'hududil'i. 'Ink'ez lizas ts'un tenahududli. 'Ink'ez ndet la 'aw lhuhuhóo'el-un cha t'ehonínzun na'hududil'i. 'Ink'ez buyust'e whuts'un nint'i-un, 'et whuz un'a 'uhuninzun. 'I be 'ants'i nahúchun le' hut'en.

19 'Ink'ez Sizi netso whudilhdzulh-un, 'en ooyust'e 'uts'int'oh. 'En 'aw soo cho lhuhuyootun. 'Et 'en gha 'on nus ts'ilhtus lneh. 'Ink'ez 'en gha ts'iyawh 'ilho 'uztileh. 'Et whuz un'a ooyust'e nuyeh. Ndai nuyeh-i, 'i Yak'usda 'en 'uhóonla.

20 'udek'ez ndi yun k'ut nohba 'alha 'uhoont'oh-un, 'et whuch'a Gri 'en bulh dasáhtsai le' 'ahja. 'Ink'ez 'andit dzin 'et di ha 'awhuz hukw'une' 'aht'en?

21 Oot'a oohnalh junih! Khun oonahóhlih junih! Nóhle' junih! 'Et za whunohodalh'e'.

22 Ndi ndunt'oh-i, 'i ts'iyawh gak whulhlih. Khuni netl'a dit'ai-i 'ink'ez dune whuneoodalh'e'-un, 'et whuz un'a za 'uhoont'oh.

23 'Et ts'iyawh be ts'uwhunih-i bulh 'unt'oh le' 'unt'oh. 'Et whe dune dich'oh duk'un'a tenahududli huwhulhtsi. Te'hududil'en na'hududil'i. 'Ink'ez duyust'e dzoh nahuyulhdzut. 'Et hoontsi' 'ohwhi 'aw hoonli lhuhooloh. 'Et ndúhoont'oh-un ts'iyawh 'aw neyust'e lubeshi whuts'u nint'i-un, 'aw 'et whuch'a nela 'ewhudoneh ait'oh.

Neyust'e lubeshi whuts'u nint'i-un whulazdootni k'us Gri nets'u hukwa' ninzun-un, 'et za hukwa' 'uznoozin

3 1 'Et huwa Gri 'en bulh dunadahdil de, 'et ndo Yak'uz ts'e dahoont'oh la 'et za hukwa' 'untihzilh. 'Et Gri Yak'usda nailhni ts'unk'us usda.

2 Ndo yak'uz ts'e dahoont'oh la 'et za noheni toh whudólh'a', ndi yun k'ut 'uhoont'oh'un, 'et iloh huwun nuní nahzut.

3 Dasáhtsai le' 'aht'oh 'ink'ez 'ilhiz be kháhna-i, 'i Gri 'en bulh Yak'usda bulh 'ilho sahle'.

4 Gri 'en be ts'úkhuna-i 'unt'oh. 'Ilhudzin be hoodutaltsilh 'et 'oh de nohni cha ye dizti'-i, 'i be 'en bulh whuz un'a 'utihnelh.

5 'Et huwa ndi yun k'ut nohyust'e daootsah-un howa núlhtih. Ninta lhe'zooht'en, ninta' ts'ut'ih-un, 'ink'ez whudutsun tune' ooh't'en junih, 'ink'ez ninta' uztit'elh'un, 'et hukwa lhe'nuzooszin, hoontsi' tune' utiht'en-un hukwa' noohzin junih, 'ink'ez 'uyoonne ch'e' ha' noohzin junih, 'et 'uk'eltsi neba 'alha' 'unt'óh-un le' hoont'oh. 6 'Et whula gha ts'e, mbene la ndut'enne, 'enne bugha Yak'usda ye hunilch'e-i, yuk'unulhe'ust'enne, 'enne ts'iyawh butsu' hóolts'ulh. 7 'Oh da' nohni cha 'et za ndáht'en inle'. 8 'Et hoontsi' 'andit njan ndaht'en-un ts'iyawh whula doohtni huba' hoont'oh. Huzahke-un, hunulhch'oh cha, k'unáhdzun, Yak'usda ch'az yalhduk-un, khuni untsi-i bé yalhduk, 9 'ink'ez lhunooht'ah junih. 'Et 'uda' dats'int'oh la inle', 'un whutulhdil 'et huwa. 10 'Ink'ez 'andit 'uyoonne nasahdli'. 'Et mbe whuz un'a 'uneyinla, ndet ooghun t'ets'oninzun-un, 'et 'i be 'on nus ulhtusne nats'usdli'. 'Et whe nts'en'a Gri unli-un, 'en ook'un'a 'uts'oot'e' ha. 11 Mbene la ooba 'alha' 'uhoont'ohne, 'enne ts'iyawh lhunduhúlt'oh. 'Aw Greekné k'us Lizwifne hooloh. 'Aw yuka dune unli-i k'ut 'ust'usne k'us 'aw lhit'usne cha, 'uts'iz de haindene k'us Scythia whut'enne cha, 'ulhnane k'us bula nahuditnine dune cha, 'enne ts'iyawh. 'Et hoontsi' Gri 'en za ts'iyai unli 'ink'ez ts'iyawh nebulh 'únt'oh.

'Andit dune nasdli'-un dant'oh la

12 Yak'usda 'utahanóhanla 'et whe ooch'e' 'ahli, 'ink'ez nohk'entsi'. 'Et huwa ndiz un'a ooh't'e'. 'Uyoonne gha te'noohzin, 'uyoonne ts'un oohzoo', yo 'ududólhdzin, 'ink'ez 'uyoonne nanilh'tsulyaz ne'boolh'en. 'Ink'ez ts'iyantsuk sa' whe dzoh nutihzút-un whulh oohyin. 13 Lhulh soo' ts'int'oh, 'ink'ez ts'iyantsuk lhba whunawhudulhneh. Nohtoh 'ilhoghun 'uyoon k'e' hoon'ai de, nts'en'a Gri nohba whunaoodilhnoh, nohni cha whuz un'a za buba whunaoodoolhnoh. 14 Be lkh'e ts'utsi'-i, 'i 'udetso nets'óo'alh. 'I be 'uk'enus hoonzoo whe 'ilho 'uts'int'oh. 15 'Ink'ez Yak'usda be nedzi dizghel-i, 'i be nohdzi yo k'une' hool'en 'utahanóhanla 'ilho yust'e oole' ha. 'Ink'ez musi noohzin. 16 Gri ooghuni be whutnih-i cha soo cho nohdzi yo hólé'. Yak'usda ooghuni be 'ahjun. Shun be teni' uznilhdzun-i cha. 'Et Ndoni be 'ahjun. Whulhodulh'eh 'ink'ez lhgha dáhtni. Be hoonzoo-i, 'i be nohdzi yo hólé', 'ink'ez neMoodihti ts'un 'ahjun.

17 'Ink'ez daht'en nohghuni 'ink'ez noh'e'ut'en whe cha, Sizi neMoodihti boozí, 'i be ndaht'en. 'Ink'ez 'en be Yak'usda neBá, 'en ts'un musi dahni.

Lhuzkehkene Yak'usda ooba 'alha' 'unt'ohne

18 Nohni ts'ekoo nohkike butl'a' dudulhye, 'et neMoodihti ba hoonzoo whe' hoont'oh.

19 Dune noh'atke buk'eoohsi'. 'Ink'ez bube zóohla' junih.

20 Ts'oodunne ts'iyantsuk whe nohdusneke buk'une' oohten. 'Et ndaht'en de, neMoodihti hoont'i'.

21 'Ink'ez dunene nohuzkehke hubunólhch'eh junih! Doo ka si iloh tune' hut'en hoole'.

22 Nohni 'ustlenne unline, ndi yun k'ut nohmoodih unline, 'enne ts'iyawh buk'une' ooht'en. Nohmoodih nohnih'en te za ooht'en junih. 'Et hoonts'i nohdzi ts'ih'un un'a whe Yak'usda bé nulhjut, 'ink'ez nohmoodihne buk'une' ooht'en.

23 'Ink'ez daht'en-un nohdzi ndulcho-i be ndóht'en. Ndaht'en-un neMoodihti za ba 'aht'en 'aw dune ba iloh 'aht'en.

24 T'eeonúhzun neMoodihti nohts'u yoozi-i, 'i nohgha ítelelh. Gri neMoodihti 'en be 'ulhnane 'ahli 'et huwa.

25 'Et hoonts'i tank'us ítelhne, 'enne whuz un'a buba 'uk'elha whutaleh. 'Ink'ez neBá nalh ts'iyawh lhgha za 'uts'int'oh 'et huwa.

4 ¹ 'Ink'ez nohni moodih unline, nohe'ustlenne ts'ih'un 'unt'oh-i 'ink'ez lhgha 'unt'oh, 'i buba k'elha yulh'i. T'eeonuhzun nohni cha ndo yak'uz ts'e nohMoodihti hoonli.

Ye unzoo-i, 'i bulh Gri ba ts'oot'en

2 'Ahoohyiz tenadahdli. 'Ink'ez musi dahni.

3 Wheni cha neba tenadoohdli. Yak'usda neba dáha' dootan ooghuni be yats'oolhduk ha. 'Et Gri ghun whe' hoont'oh hooyoh-un, 'et ts'iyanne, ts'un howu yats'oolhduk. 'Andit 'et huwa 'adus'ai.

4 'Ink'ez sba tenadoohdli, yatisduk-un ts'ih'un un'a 'udoosni' ha.

5 Ooba 'alha' lhe'hoot'ohne, 'enne soo cho bughohle'. Ndet 'andit nohghá whults'ut-un, whunih be 'uhoolh'en.

6 'Ahoohyiz nohghuni unzoo-i be bubulh yaoolhduk. 'Et huwa t'eeonóhzin buba hootazoo' k'un'a, 'et 'ilhoghun hinli whe bubulh yátílhduk.

'Udek'ez khuni butl'a nádit'ai

7 Ndun Tychicus, 'en neulhutsin ook'ets'intsi'-un, 'ink'ez neMoodihti 'en ba ts'ih'un un'a nela 'ut'en, 'ink'ez Sizi Gri ba sulh 'ulhna unli. 'En si sghun ts'iyawh nohdutánelh.

⁸ 'Inka 'et huwa nohts'ú tís'a'. 'Et datoht'oh-un soo cho t'ewhuntizeh ha, 'ink'ez nohdzi do na'yooleh.

⁹ Onesimus 'en yulh ti'us. 'En cha ts'ih'un un'a neulhutsin 'ink'ez wheni ts'iyawh ookw'ets'intsi', nohbulh 'ilhoghun 'unt'oh. 'Enne bugha njan ts'iyawh dawhut'en-un t'ewhuntizeh.

¹⁰ Aristarchus, 'en cha sulh 'adin'ai 'ink'ez hadih nohúlhni. 'Et Barnabas oonat-un, Mark, 'en cha hadih nohúlhni. Ootsun datít'elh-un, 'et 'uda' t'eonáhzun. Nohghu ninya de, soo cho hoonáht'i' whe nohghoya'.

¹¹ 'Et Sizi, Zoosta cha huyulhni, 'en cha hadih nohúlhni. 'Enne ts'iyawh yuka dune unli-i k'ut 'ust'usne 'úhint'oh. 'Enne za Yak'usda dune k'úne' bul'en-un, 'et huba sla' hut'en, 'ink'ez sóo sla' hut'en.

¹² Epaphras 'en cha nohbulh 'ilhoghun 'unt'oh, 'ink'ez hadih nohúlhni. Gri ooba 'ulhna 'unt'oh. Soo k'us hooncha whe nohba tenadudli. 'Et whe Yak'usda nohts'un hukwa' ninzun-un, ts'ih'un un'a 'en ba nudútalhyalh 'ink'ez lhadúlyane cha tihleh.

¹³ 'Alha 'udusni, hooncha whe nohba nint'i. 'Aw nohni za iloh, ndunne Laodicea whut'enne cha 'ink'ez ndunne Hierapolis whut'enne, 'enne cha.

¹⁴ Luke 'en yoo be duyun unli, 'en ts'iyawh ook'ets'intsi' 'ink'ez Demas 'en cha hadih nohúlhni.

¹⁵ Ndunne Laodicea whut'enne neulhutsinke, 'enne ts'iyawh hadih neba budóhni. 'Ink'ez Nymphas, 'en cha, ooyoh Yak'usda ba 'ilhunaoodulhne, 'enne cha hadih sba budóhni.

Ye unzoo-i nohbulh óot'e'

¹⁶ Nohnich'oh nohtoh ndi 'udustl'us ook'u yalhduk de, mbene la Laodicea Yak'usda ba 'ilhunaoodulhne, 'enne cha hik'u yaoolhduk huba' hoont'oh. 'Et ndai 'udustl'us but's'o t'l'a iyan'ai-i, 'i cha nohni cha ook'u yaoolhduk.

¹⁷ 'Ink'ez Archippus 'en dóhni', “NeMoodihti ndet ntl'a hón'ai-un, ts'iyawh lhaoodonleh. 'Et whuz un'a la lhaoodonleh”.

¹⁸ Sich'oh sla be hadih dusni whe 'uk'u nusúsguz, “Paul”. Ndi sluztíh t'l'oolh be 'adus'ai onaoodoolhnoh junih. Ye unzoo-i nohbulh oot'e'. 'Et ndo honeh.